

PRAVILA PRIVATNOSTI

Cilj Pravila privatnosti Kantonalnog suda u Sarajevu (u daljem tekstu: Sud) je da, u skladu sa članom 14. i 68. Zakona o zaštiti ličnih podataka (u daljem tekstu: Zakon), svim licima čije lične podatke Sud obrađuje, pruži osnovne informacije o navedenoj obradi na transparentan način.

Pravila privatnosti se primjenjuju na sve lične podatke koje sud prikuplja, upotrebljava ili na drugi način obrađuje, direktno ili putem drugih kontrolora. Prema Zakonu, dole navedeni pojmovi imaju sljedeća značenja:

Lični podatak je svaki podatak koji se odnosi na fizičko lice čiji je identitet utvrđen ili se može utvrditi.

Obrada ličnih podataka je svaki postupak ili skup postupaka koji se obavlja na ličnim podacima ili na skupovima ličnih podataka, automatizovanim ili neautomatizovanim sredstvima kao što su prikupljanje, evidentiranje, organizacija, strukturiranje, čuvanje, prilagođavanje ili izmjena, pronalaženje, ostvarivanje uvida, upotreba, otkrivanje prenosom, širenjem ili stavljanjem na raspolaganje na drugi način, usklađivanje ili kombinovanje, ograničenje, brisanje ili uništavanje.

Kontrolor podataka je fizičko ili pravno lice, javni organ ili nadležni organ koji samostalno ili sa drugim određuje svrhe i sredstva obrade ličnih podataka.

Nadležni organ je organ koji je nadležan za sprječavanje, istragu i otkrivanje krivičnih djela, gonjenje učinilaca krivičnih djela ili izvršenje krivičnih sankcija, uključujući i zaštitu i sprječavanje prijetnji javnoj sigurnosti, kao i pravna lica ako su zakonom ovlaštena za obavljanje ovih poslova kao posebna kategorija.

1. Podaci o kontroloru podataka

Kantonalni sud u Sarajevu, Šenoina 1, 71000 Sarajevo

Tel: +387 33 -567 801

Fax: +387 33-567 802

e mail: ksud-sarajevo@pravosudje.ba

Službenik za zaštitu ličnih podataka

Merima Čengić-Arnaut

e mail: merima.cengic-arnaut@pravosudje.ba

Tel. +387 33-567-860

Zamjenik službenika za zaštitu ličnih podataka

Alma Šator

e mail: alma.sator@pravosudje.ba

Tel. +387 33-567-863

2. Svrha i pravni osnov obrade ličnih podataka

Vaše lične podatke Sud obrađuje u skladu sa Zakonom, a na osnovu Zakona o sudovima u Federaciji Bosne i Hercegovine.¹, izvršavajući svoje nadležnosti i ovlaštenja. Navedene nadležnosti i ovlaštenja uključuju:

¹ (Član 28. Zakona o sudovima F BiH, „Službene novine Federacije BiH“, br.38/05, 22/06, 63/10, 72/10, 7/13, 52/14 i 85/21)

Prvostepena nadležnost: suđenje za krivična djela za koja je zakonom propisana kazna zatvora više od 10 godina ili dugotrajni zatvor, ako zakonom nije određena nadležnost drugog suda; postupanje u toku istrage i nakon podizanja optužnice u skladu sa zakonom; suđenje za krivična djela za koja je Sud Bosne i Hercegovine prenio nadležnost na kantonalne sudove i odlučivanje u svim upravnim sporovima, kao i o zahtjevima za zaštitu sloboda i prava utvrđenih ustavom, ako su takve slobode i prava povrijeđeni konačnim pojedinačnim aktom ili radnjom službenog lica u organima uprave, odnosno odgovornog lica u preduzeću, ustanovi ili drugom pravnom licu kada za zaštitu tih prava nije osigurana druga sudska zaštita.

Drugostepena nadležnost: odlučivanje o žalbama protiv odluka općinskih sudova; odlučivanje o žalbama izjavljenim na rješenja o prekršajima; odlučivanje o drugim redovnim i vanrednim pravnim lijekovima, ako je to određeno zakonom.

Ostalo: rješavanje o sukobu mjesne nadležnosti između općinskih sudova sa područja kantona; odlučivanje o prijenosu nadležnosti sa jednog općinskog suda na drugi općinski sud na području kantona; odlučivanje o brisanju osude i prestanku mjera sigurnosti i pravnih posljedica osude na osnovu sudske odluke; postupanje po molbama za pomilovanje u skladu sa zakonom; rješavanje o priznanju odluka stranih sudova, stranih trgovačkih sudova i stranih arbitraža; pružanje međunarodne pravne pomoći u krivičnim predmetima i obavljanje drugih poslova određenih zakonom.

3. Period čuvanja ličnih podataka

Vaše lične podatke Sud obrađuje u periodu koji je potreban da se ispuni svrha njihove obrade. Nakon prestanka svrhe u koju su prikupljeni, vaši lični podaci više se ne koriste, ali se čuvaju u arhivi onoliko vremena koliko obavezuju zakonski propisi o arhivskoj građi.

4. Tehničke i organizacione mjere zaštite ličnih podataka

Vaše lične podatke Sud obrađuje na način kojim se obezbjeđuje odgovarajuća bezbjednost i povjerljivost kao i odgovarajuća primjena principa zakonite obrade ličnih podataka te smanjenje obima ličnih podataka po principu neophodnosti.

Preduzete su fizičke, tehničke i organizacione mjere zaštite ličnih podataka. Svi zaposleni u Sudu potpisali su izjave o povjerljivosti ličnih podataka kojima imaju pristup.

5. Koja su Vaša prava u vezi sa obradom ličnih podataka?

Vaša prava, uz izuzetke propisane posebnim zakonom, su:

- pravo na pristup svojim ličnim podacima;
- pravo na ispravku ličnih podataka;
- pravo na brisanje ličnih podataka i
- pravo na prigovor.

Zahtjev za ostvarivanje prava podnosi se pisanim putem direktno na protokol suda, putem pošte na naprijed naznačenu adresu ili putem elektronske pošte na e-mail adresu: merima.cengic-arnaut@pravosudje.ba ili alma.sator@pravosudje.ba.

Ukoliko je lice čiji se podaci obrađuju nezadovoljno postupanjem suda, može se obratiti nadležnom nadzornom organu Agenciji za zaštitu ličnih podataka BiH (www.azlp.ba) ili pokrenuti postupak pred nadležnim sudom.

6. Prenos ličnih podataka drugim kontrolorima podataka, prenos ličnih podataka u inostranstvo

Vaše lične podatke Sud može dati drugim kontrolorima ukoliko je to potrebno za izvršavanje zakonom propisanih obaveza. Također, vaše podatke Sud neće prenositi drugim kontrolorima u inostranstvu, osim ukoliko takva obrada nije neophodna na osnovu zakona ili međunarodnog ugovora koji ga obavezuje.

Vaše lične podatke Sud daje pružaocima informatičko-komunikacionih usluga s kojima je zaključio ugovor i koji poštuju pravila postupanja s ličnim podacima

7. Korištenje kolačića i objava sadržaja na web-stranici

Objavljivanje sudskih odluka/presuda i informativnog sadržaja na web-stranici Suda vršit će se u skladu sa zakonima i podzakonskim aktima, poštujući princip transparentnosti rada Suda, uzimajući u obzir javni interes, pravo na zaštitu privatnosti i zaštitu ličnih podataka, te zaštitu interesa maloljetnika, svjedoka i oštećenog.

Web stranica Suda koristi određene skripte koje mogu pohranjivati i koristiti određene informacije iz vašeg browsera i vašeg uređaja (npr. IP adresa uređaja, varijable o sesiji unutar browsera, ...). Neke od ovih informacija su nam neophodne i bez njih web stranica ne bi mogla funkcionisati u svom punom obimu, dok neke nisu prijeko neophodne, a služe za dodatne stvari (npr. procjenu nivoa posjećenosti, budućeg usavršavanja stranice...).

Prilikom posjete web stranici možete dozvoliti ili uskratiti pravo na korištenje tih informacija.

8. Promjene Pravila privatnosti

Sud će redovno ažurirati Pravila privatnosti kako bi sadržavala tačne informacije. O svim izmjenama i dopunama bit ćete blagovremeno informisani u skladu sa principom transparentnosti.